



ŠTA MI JE ISPRIČALA TANJA

Urbi et orbi
Ja sam umorna žena
Umorna od muškaraca koji prolaze
Jedan ti otkine komad srca
Drugi uništi jetru
Treći opelješi novčanik
Kad dođe četvrti zaključaš sva vrata
Ne daš mu da se približi
Pasja iskustva nas oblikuju
Mon chéri

U Goriju
Posjetila sam Staljinov muzej
U mladosti pisao je ljubavnu liriku
Pjesnik se lako pretvori u ubicu
A ubica u pjesnika
Časovi kreativnog pisanja, tako to zovu
Okupe zatvorenike, daju im list papira da se olakšaju
I u psihijatrijskim klinikama to rade
Tako nastaje najbolja poezija
Ogoljavanje
Krv i meso.

JEHOVINI SVJEDOCI

Nepoznate žena
Žena mi nudi letak
Za Spasenje

Gledam u njene otužne cipele
U njene suhonjave ruke
U njenu samoću
I plačem

STRUNE U DALEKIM VRTOVIMA

Padala je kiša granata
Starica iz Vlasenice kojoj su ubili 4 sina pjevala je:
Bosno moja, divna mila, lijepa, gizdava, aaaaaaaaaa
Drhtale su izrađene, mršave ruke
I plakali smo dok se plakati moglo
Dok rat nije postao prirodno stanje.
Naše su kuće svikle na cvilež, poniženje, tjeskobu i tupost
Na orgije pijanih barbara
Što se umorni od silovanja i paleži
Bez kazne i suda vraćaju mirnom domaćinskom životu.
Preostaju nam jalove godine i oglodane kosti.
Moja duša je plavi leptir nad Artemisijom.¹
Moj dom je tamo gdje majka mijesi hljeb na ognjištu
Tamo na onoj uzbrdici
Tamo su posjekli stogodišnje stablo
Ujutro će zakopati sjekire
Neće ostati znaka ni traga
Sve će se zaboraviti sutra.

¹ Plavi leptir hrani se divljim cvijetom iz porodice Artemisija, koji raste na masovnim grobnicama uslijed geofizičke anomalije tla. Amor Mašović, predsjednik Federalne komisije za traženje nestalih kaže da su članovi njegove komisije, pored drugih metoda, masovne grobnice otkrili i uz pomoć plavog leptira.